

मार्निंग डोगरी न्यूज़ बुलेटिन, समें. 09-20 Hrs

<><><><><><>

## Headlines

- लोकसभा चुनावें दे पैहले गेड़ लेई चुनावें प्रचार नै जोर फगड़ी लैते दा ऐ। सियासी पार्टिं दे लीडर अपने-अपने मेदवारें दे हक्कै च समर्थन कढेरने दी पुरजोर कोशश करा'रदे न।
- कृतज्ञ राष्ट्र बाबा साहेब डॉ. बी.आर.अम्बेडकर हुंदी 134मीं जयंति पर उनेंगी श्रद्धांजलि अर्पित करा'रदा ऐ।
- बूथ सतह दे अफसर एह पक्का करगंन जे 100 फीसद वोटर स्लिपां मतदान कशा 5-7 दिन पैहले मतदाताएं तगर पजाई दित्तियां जान।
- भारती चुनावें आयोग नै आँदे लोकसभा चुनावें लेई "Know Your Candidate" ऐप शुरू कीता ऐ।
- डोडा जिले च इक वैन दे डूहगी खड्डै च रूलकने करी दऊं न्यानिएं भैनें समेत 6 जने मारे गे ते 4 जख्मी होई गे।

<><><><><><>

## Campaign

लोकसभा चुनावें दे पैहले गेड़ दे मतदान आस्तै राजनीतिक पार्टिं अपने मेदवारें आस्तै प्रचार तेज करी दित्ता ऐ। बक्ख-बक्ख राजनीतिक दल अपने स्टार प्रचारकें गी मैदान च तोआरियै रैलिएं ते रोड शो आयोजित करा'रदे न। पैहले गेड़ च जम्मू कश्मीर दी उधमपुर लोकसभा सीट आस्तै 19 अप्रैल गी वो पोंगन। इस सीट पर कांग्रेस मेदवार चौधरी लाल सिंह हुंदे आसतै प्रचार करदे होई पार्टी नेता राज बब्बर होरें कल लोकें गी भरोसा दोआया जे सत्ता च आने मगरा कांग्रेस अग्निवीर स्कीम गी खत्म करियै आम नियुक्तियां ब्हाल करोग। उनें आक्खेआ जे मोदी सरकार दी नीतियां युवा विरोधी, गरीब विरोधी ते करसान विरोधी न ते देश दे अहम मुद्दें पर प्रधानमंत्री होर ध्यान नेई दिंदे। एहदे शा पैहले बीजेपी स्टार प्रचारक प्रधानमंत्री नरेन्द्र मोदी होरें ते उत्तर प्रदेश दे मुख्मन्त्री योगी आदित्यनाथ होरें जम्मू दे उधमपुर ते कठुआ च बीजेपी मेदवार डॉ. जितेन्द्र सिंह हुंदे आस्तै रैलियां कीतियां हियां। केन्द्र गृहमन्त्री अमित शाह होर जम्मू च 16 अप्रैल गी अपनी पैहली चुनावी रैली करगंन।

शाह होर जम्मू संसदीय क्षेत्र थमां बीजेपी मेदवार जुगल किशोर शर्मा हुंदे आस्तै प्रचार करगंन। तोआई नैशनल कांफ्रेंस दे प्रधान डॉ. फारूक अब्दुल्ला होरें कल आखेआ हा जे INDIA गठबंधन दजम्मू कश्मीर ते लद्दाख च सारिएं 5 सीटें पर जित्त हासल करोग।

<><><><><><>

B.R.Ambedkar

राष्ट्र अज्ज भारतीय संविधान दे मुख निर्माता डॉ. बी.आर.अम्बेडकर हुंदी 134मीं जयंति पर श्रद्धांजलि अर्पित करा करदा ऐ। इस मौके पर देस भरै च नेकें कार्यक्रमें दा सरिस्ता कीता जा करदा ऐ। मुख समारोह संसद भवन परिसर च लग्गोग जित्थें बाबा साहेब अम्बेडकर हुंदी प्रतिमा पर फुल्ल चाढ़े जांगन। राष्ट्रपति द्रौपदी मुर्मू ते उपराष्ट्रपति जगदीप धनखड़ होरें बाबा साहेब हुंदी जयंति पर लोकें गी बधाई दित्ती ऐ। प्रधानमंत्री नरेन्द्र मोदी होरें डॉ. बाबा साहेब अम्बेडकर होरें गी उंदी जयंति पर श्रद्धांजलि भेंट कीती ऐ। उनें डॉ. अम्बेडकर हुंदी जीवन यात्रा पर आधारित 2 मॅट 20 सैकेंड दा इक वीडियो बी सोशल मीडिया पर सांण कीता ऐ।

<><><><><><>

BLO-Voter Slip

जम्मू कश्मीर च पार्लिमानी चुनाएं च मतदाताएं दी बद्धोबद्ध शमूलियत गी पक्का करने लेई चुनां प्रशासन नै बूथ-सतह दे सब्बने अफसरें गी चुनां दी तरीकै कशा 5-7 दिन पैहले 100 फीसद मतदाता स्लिपां बंडी देन। तोआई केन्द्री सशस्त्र पुलस बलें ते जम्मू कश्मीर पुलस आस्सेआ फलैग मार्च कीते जांगन ते ममूली आली गश्त बधाई दित्ती जाग ते नाकें गी तगड़ा कीता जाग तां जे राष्ट्र विरोधी ते समाज दे दुश्मन अनासिरें पर काबू कीता जाई सकै ते लोकें दे विश्वास गी बघाया जाई सकै। अधिकारिएं मूजब इनें हीलें दा मकसद ऐ जे हर मतदाता कश अपनी वोटर स्लिप होवै ते ओ सिद्दे अपने मतदाता केन्द्र च जाइयै वोट पाने दे अपने अधिकार दा इस्तेमाल करी सकै ते ब0 शा बद्ध लोक वोट पाने गी औन। जम्मू कश्मीर दे मुख चुनां अधिकारी पी.के. पोले होरें इस चाल्ली दे सब्बने इंतजामें दी नजरसानी करा'रदे न। जम्मू कश्मीर च उधमपुर-डोडा, जम्मू-रियासी, अनंतनाग-पुंछ-राजौरी, रनगर ते बारामुला 5 पार्लिमानी हल्कें न।

<><><><><><>

## BJP Manifesto

भारती जनता पार्टी औंदे लोकसभा चुनाएं लेई अज्ज अपना घोषण पत्र जारी करोग। पार्टी नै इसी संकल्प पत्र दा नां दित्ता ऐ। नमीं दिल्ली च बीजेपी मुख्यालय च प्रधानमंत्री नरेन्द्र मोदी हुंदी मजूदगी च एह संकल्प पत्र जारी कीता जाग। इस मौके पर पार्टी दे होर दुए वरिष्ठ लीडर बी मजूद होंगन।

<><><><><><>

## Terror Hideout

सुरक्षा बलें कल इक आतंकवादी ठकाने तोड़ी पुज्जियै थेआर ते गोला बरूद बरामद कीता। इक सूह थोने मगरा जम्मू कश्मीर पुलस ते राश्ट्री राइफल्स नै किट्ठे रलियै रियासी दे म्हौर च लांचा थाहर पर तपाशी अभियान चलाया। इस दरान इक रूट्टी आले डब्बे च आईईडी ते 2 पिस्तौलां बरामद कीतियां। तोआई रोजौरी च मोबाइल फोन दे डब्बे अंदर बी आईईडी लब्बी ते उसी नकारा करी दित्ता गेआ।

<><><><><><>

## Doda Accident

डोडा जिले च कल संजा पेश आए दे इक शिड़क हादसे च 2 न्यानिएं कुड़िएं, जेहड़ियां के भैनां बी हियां सनें 6 लोकें दी मौत होई गई ऐ। आकाशवाणी जम्मू संवाददाता नै दस्सेआ जे एह हादसा उसलै पेश आया जिसलै गड्डी ठाठरी थमां खानपुरा फगसू बक्खी अगड़ी आवा'रदी ही। उपराज्यपाल मनोज सिन्हा होरें इस हादसे च होए दी मौतें पर दुख जाहर कीता ऐ। अपने बसोसी सनेह च उपराज्यपाल होरें आक्खेआ जे ओह इस हादसे च होए दे जिंदे दे नुकसान पर मते दुखी न ते मरने आलें दे परोआरें कन्नै खड़ोते दे न। उनें आक्खेआ जे ओह जख्मिएं दे तौले नरोए होने आस्तै प्रार्थना करगंन। इस हादसे च 4 लोक घायल बी होए दे न। जिला प्रशासन नै प्रभावत लोकें गी हर सहूलियत पजाने दे निर्देश जारी कीते गे न।

<><><><><><>

## ECI-KYC

ओंदे लोकसभा चुनावें दरान जवाबदेही ते पारदर्शिता गी तगड़ा करने लेई भारती चुनावें आयोग नै “know Your Candidate” नां कन्नै इक नमीं ऐप विकसित कीती ऐ। आकाशवाणी जम्मू दे संवाददाता दी रिपोर्ट मूजब इस ऐप राएं नागरिकें गी चुनावें लड़ा'रदे मेदवारें दी अपराधिक प्शोकड़ बारे पता लाने च मदाद हासल होग। केवाईसी ऐप गी इस्तेमाल करने लेई मतदाताएं गी “चुनां दी किस्म” टाइप करियै असैंबली जां पार्लिमानी चुनावें हल्कें दा नां लिखना होग, जेह्दे नै नामांकित मेदवारें दी फौरिस्त सामनै आई जाग। मतदाता इआं सिद्दे मेदवार दा नां लिखियै बी ओह्दे बारे जानकारी हासल करी सकदे न। एह ऐप मेदवार दी अपराधिक प्शोकड़ बारे पूरा ब्यौरा देग। ओह्दे खलाफ किन्ने अपराधिक मामले दर्ज न, उनें मामलें दी इसलै स्थिति केह ऐ ते अपराधें दा सोआतम कनेया ऐ। एह्दे च कन्नै मतदाता अपने मेदवार दे बारे च पूरी जानकारी प्राप्त करने मगरा गै एह फैसला करी सकगंन जे उंदा कीमती वोट किस मेदवार गी जाना चाहिदा।

<><><><><><>

## Anantnag-Rajouri

जम्मू कश्मीर च अनंतनाग—राजौरी संसदीय हल्के आस्तै चुनावी अधिसूचना दे पैहले दिन इक मेदवार नामांकन भरेआ ऐ। आकाशवाणी जम्मू नै जानकारी दित्ती ऐ जे भारती चुनावें आयोग ते अनंतनाग राजौरी लोकसभा सीट आस्तै इक अधिसूचना जारी कीती ऐ, जेह्दे आस्तै वोट त्रिये गेड़ च 7 मई गी पोआए जांगन। दूई बक्खी अजें तोड़ी नैशनल कांफ्रेंस नै इस सीट आस्तै परिष्ठ गुज्जर नेता मियां अल्लाफ होरें गी मैदान च तोआरेआ ऐ। पीडीपी ते साबका मुखमंत्रि महबूबा मुपती होरें गी अपने मेदवार दे तौर पर अग्गे कीता ऐ। अल्लाफ बुखारी ह्नी अपनी पार्टी ने इस सीट आस्तै जफर मन्हास होरें गी पार्टी दा मेदवार बनाया ऐ।

<><><><><><>

## General Observer

4—उधमपुर पार्लिमानी हल्कें दे चुनावें निगरान धीरज कुमार हुंदे निर्देशें पर कठुआ दे राजबाग पुलस थाने च किश बेपंछानू लोकें खलाफ एफआईआर दर्ज करोआई गई ऐ जेह्ड़े जुठाना थमां सोफाई तकर प्रधानमंत्री ग्राम सड़क योजना तैह्त बनाई जा'रदी सड़कें पर ट्रैफिक दी आओजाई गी रोका'रदे हे। आकाशवाणी जम्मू दे संवाददाता मूजब एह मामला उसलै सामने आया जिसलै चुनावें निगरान जिला कठुआ दे दूर—दरेड़े इलाकें च स्थित मतदान केन्द्र दा दौरा ला'रदे हे। मतदान केन्द्र सोफाई थमां थोड़ी पिच्छे सड़कै पर इक बड़डा मगोर दिक्खेआ गेआ जेह्दे नै ट्रैफिक दी आओजाई च बिघ्न पवा'रदा हा।

चुनां निगरान होरें उंदे नै मजूद अफसर गी ताकीद कीती जे ओ इक कम्मै च शामिल लोकें खलाफ एफआईआर दर्ज करवान। एसएचओ राजबाग पुलस थाने गी इत्त सरबंधै च रिपोर्ट दित्ती गई ते आईपीसी दी धारा 341 ते 431 तैहत एफआईआर दर्ज करोआई गई।

<><><><><><>

## DG-RPF

रेलवे सुरक्षा बल दे डीजी मनोज यादव होरें नमिएं रेलवे लाइनें ते बनिहाल-संगलदान बश्कार बने दे रेलवे स्टेशनें दा निरीक्षण करने आस्तै 2 दिनें दे दौरे दी शुरूआत कीती। एह रेलवे निर्माण कम्म जम्मू दे रामबन जिले च कीते गे न। आकाशवाणी जम्मू नै जानकारी दित्ती ऐ जे यादव होर रेलवे सुरक्षा बल ते उत्तर रेलवे दे अधिकारिएं कन्ने श्रीनगर थमां बनिहाल इक खास निरीक्षण रेलकार च पुज्जे ते रेलवे स्टेशन आरपीएफ चौकी दा निरीक्षण कीता। एह्दे मगरा उनें खारी सुंबर ते संगलदान रेलवे स्टेशनें दा दौरा कीता ते रेलवे सुरक्षा बल दी तैनाती दा निरीक्षण कीता। ध्यानजोग ऐ जे 48.1 किलोमीटर लम्मा बनिहाल-संगलदान रेल रस्ता जेहड़ा के उधमपुर-श्रीनगर-बारामुला रेल संपर्क परियोजना दा हिस्सा ऐ। इसी प्रधानमंत्री नरेन्द्र मोदी होरें 20 फरवरी गी देसै दे नमित लाया हा।

<><><><><><>

## Mugal Road

मुगल रोड गी जेहड़ी के कश्मीर घाटी दे शोपियां जिले गी राजौरी ते पुंछ कन्ने जोड़दी ऐ, ताजी बर्फबारी दे चलदे बंद करी दित्ता गेआ ऐ। जिले दे सूचना अधिकारी विशाल दीप चंदन होरें आखेआ ऐ जे "पीर की गली" सनें किश थाहरें पर ताजी बर्फबारी होने करी ऐ रस्ता बंद करना पेआ ऐ।

<><><><><><>